

**JAVNI POZIV
ZA DOSTAVLJANJE RADOVA ZA IZBOR
NAJBOLJEG RADA POSVEĆENOG NAUČNOM I
JAVNOM ŽIVOTU AKADEMIKA PROF. DR
HAMDİJE ĆEMERLIĆA (1905.–1990.)**





Univerzitet u Sarajevu – Pravni fakultet, u partnerstvu sa Akademijom nauka i umjetnosti Bosne i Hercegovine, Rektoratom Univerziteta u Sarajevu, Univerzitetom u Sarajevu – Fakultetom političkih nauka i Univerzitetom u Sarajevu – Fakultetom islamskih nauka, povodom 120. godišnjice rođenja akademika prof. dr Hamdije Ćemerlića,¹ organizuje konferenciju posvećenu njegovom liku i djelu, koje je uprkos vremenskoj distanci od 120 godina od njegovog rođenja i 35 godina od njegove smrti, ostalo neistraženo. Tek je 2024. godine prevedena i objavljena njegova doktorska disertacija („Izborni sistemi u Jugoslaviji“, University press/Federalno ministarstvo obrazovanja i nauke, Sarajevo/Mostar, 2024), dok su do 2025. godine održana dva naučna skupa, koja su pokušala rasvijetliti neke slojeve ličnosti akademika Ćemerlića i njegovog javnog rada. Međutim, različiti segmenti njegove društvene, naučne i političke uloge u javnom životu BiH i Jugoslavije, kao i stavovi i razmišljanja izneseni u naučnom radu i njihova aktuelnost, ostali su zapostavljeni.

S ciljem popularizacije lika i djela akademika Ćemerlića među mlađim naučnicima i naučnicama, Organizacijski odbor objavljuje Javni poziv za dostavljanje radova za izbor najboljeg rada koji može biti posvećen jednoj od sljedećih tema (lista tema nije zatvorena i moguće je prijaviti rad koji se tiče neke druge teme, relevantne za naučni i javni rad akademika Hamdije Ćemerlića):

- *akademik prof. dr Hamdija Ćemerlić i narodna vlast u doba Narodnooslobodilačke borbe i neposredno poslije okončanja Drugog svjetskog*

¹ Akademik Hamdija Ćemerlić rođen je 1905. godine u Janji. Završio je Šerijatsku gimanziju u Sarajevu 1927. godine, a Pravni fakultet u Beogradu 1931. godine. Doktorirao je na Univerzitetu Sorbonne u Parizu (1936. godine) na temu: „O izbornom sistemu u Jugoslaviji“, te neposredno poslije toga bio je docent i vanredni profesor na Višoj šerijatsko-teološkoj školi u Sarajevu. Tokom Drugog svjetskog rata bio je aktivni učesnik narodnooslobodilačke borbe, te zasjedanja sva tri ZAVNOBIH-a, Drugog zasjedanja AVNOJ-a, i član prve Narodne Vlade Narodne Republike BiH (1945.–1947.). Bio je jedan od inicijatora osnivanja Pravnog fakulteta u Sarajevu, profesor Ustavnog prava (1947.– 1974.) i njegov dekan (1952.–1954. i 1960.–1962.). Obnašao je funkciju rektora Univerziteta u Sarajevu (1969.–1973.). Godine 1969. izabran je za dopisnog, a 1975. za redovnog člana Akademije nauka i umjetnosti Bosne i Hercegovine. Bio je jedan od osnivača Islamskog teološkog fakulteta u Sarajevu 1977. godine i njegov dugogodišnji rektor. Obnašao je i funkciju predsjednik Vrhovnog sabora IZ u SFRJ. Kao saradnik Instituta za društvena istraživanja Fakulteta političkih nauka bio je nosilac projekta „Stav Muslimana BiH prema nacionalnom opredjeljenju“ (1969.–1972.). Bio je član više stručnih udruženja, uključujući *Société de législation compare* u Parizu. Među priznanjima i odlikovanjima koje je dobio, posebno se ističu Dvadesetsedmajulska nagrada za životno djelo (1971.), Nagrada ZAVNOBIH-a (1975.) i Orden legije časti za nauku i kulturu Ministarstva kulture Republike Francuske (1976.). Umro je u Sarajevu 1990. godine. Njegov naučni opus je uključivao dominantno pitanja ustavnog prava i historije prava, a naročito narodnooslobodilačku borbu, federalizam, izborno pravo, parlamentarno pravo itd.



rata (akademik Ćemerlić je objavio 13 radova i uredio dvije knjige posvećene ZAVNOBIH-u, dok je i sam učestvovao u radu ZAVNOBIH-a i AVNOJ-a i bio član Narodne vlade Narodne Republike BiH po okončanju Drugog svjetskog rata).

- *izborno pravo – aktuelnost misli akademika prof. dr Hamdije Ćemerlića* (akademik Ćemerlić se intenzivno bavio izbornim pravom, imajući u vidu činjenicu da je odbranio doktorsku disertaciju iz ove oblasti, te redovno objavljivao radove koji su tangirali specifična pitanja uporednog izbornog prava, kao i ona socijalističke Jugoslavije).
- *aktuelnost misli akademika prof. dr Hamdije Ćemerlića o federalizmu* (akademik Ćemerlić se u svom naučnom radu intenzivno bavio najistaknutijim pitanjima u federaciji kao što su raspodjela nadležnosti, državnost federalnih jedinica, ocjena ustavnosti u federaciji, a koja su aktuelna i u današnjoj BiH).
- *uloga akademika prof. dr Hamdije Ćemerlića u osnivanju i razvoju Pravnog fakulteta u Sarajevu i pravne nauke u BiH* (akademik Ćemerlić je bio ministar pravosuđa u Narodnoj vladi BiH kada je osnovan Pravni fakultet. Bio je profesor Ustavnog prava i Istorije narodne vlasti, dekan i predsjednik Savjeta Pravnog fakulteta, kao i šef Katedre za državno i međunarodno javno pravo. Također, bio je mentor kandidatima na izradi magistarskih i doktorskih radova, uključujući prof. dr Kasima Trnku i prof. dr Omera Ibrahimagića).
- *uloga akademika prof. dr Hamdije Ćemerlića u osnivanju i razvoju Islamskog teološkog fakulteta u Sarajevu i islamskih nauka u BiH* (akademik Ćemerlić je bio rektor Islamskog teološkog fakulteta od osnivanja do juna 1986. godine, kao i profesor na predmetu Društvo-političko uređenje Jugoslavije. Bio je urednik prvog broja Zbornika radova Islamskog teološkog fakulteta).
- *uloga akademika prof. dr Hamdije Ćemerlića u razvoju Univerziteta u Sarajevu i suočavanje sa studentskim zahtjevima 1968. godine* (akademik Ćemerlić je bio rektor Univerziteta i član njegovog Savjeta).
- *uloga akademika prof. dr Hamdije Ćemerlića u razvoju političkih nauka u BiH* (akademik Ćemerlić je bio dugogodišnji predsjednik Udruženja političkih nauka u BiH i član Jugoslavenskog udruženja političkih nauka).



- *uloga akademske zajednice u afirmaciji nacije Muslimana – projekat Instituta za društvena istraživanja „Stav Muslimana BiH prema nacionalnom opredjeljenju“* (akademik prof. dr Hamdija Ćemerlić je bio nosilac projekta Instituta za društvena istraživanja (1969.–1972.), pod nazivom „Stav Muslimana BiH prema nacionalnom opredjeljenju“).
- *Šerijatska gimnazija i Viša šerijatsko-teološka škola u Sarajevu: izgradnja nauke šerijatskog prava i pravne kulture šerijatskih pravnika* (akademik Ćemerlić je završio Šerijatsku gimnaziju, dok je na Višoj šerijatsko-teološkoj školi bio docent i vanredni profesor na predmetima: Enciklopedija prava, Administrativno pravo, Ustavno pravo i Državno pravo).
- *Jadranska straža, Gajret, Hurijjet – uloga udruženja u javnom životu između dva svjetska rata* (akademik Ćemerlić je tokom studija bio sekretar Jadranske straže u Beogradu, kao i Gajretov pitomac. U Sarajevu je bio sekretar udruženja Hurijjet. U naučnoj zajednici je zanemareno postojanje udruženja Jadranska straža i njegovo djelovanje u Sarajevu. Jedan od fokusa konferencije je društvena uloga Gajreta između dva svjetska rata na primjeru akademika Ćemerlića).
- *akademski radnik kao ustavotvorac* (akademik Ćemerlić je bio ustavotvorac u više navrata i u više različitih funkcija – kao član parlamenta ili njegovih radnih tijela – čija uloga u pripremanju ustavnih akata je ostala neistražena. Na primjer, akademik Ćemerlić se zalagao za uvođenje mehanizma sudske kontrole zakona u „socijalističkoj demokratiji u skupštinskom sistemu“, dok su mu drugi autori oponirali tvrdeći kako je to protivno načelu jedinstvu vlasti. U konačnici, ovaj mehanizam je prihvaćen i integriran u ustave donesene 1963. godine).
- *razvoj ustavnosti u Islamskoj zajednici u BiH i uloga akademika Hamdije Ćemerlića u izgradnji njenog pravnog sistema* (akademik Ćemerlić je učestvovao u donošenju ustava Islamske zajednice i kao pravnik dao svoj doprinos izgradnju pravnog poretka Zajednice, naročito tokom upravljanja Vrhovnim saborom za Jugoslaviju).
- *akademik prof. dr Hamdija Ćemerlić i transpozicija francuskog prava u pravni sistem BiH i Jugoslavije* (jedna od najmanje istraženih tema jeste utjecaj



obrazovanja u Francuskoj i francuske pravne nauke u profesionalnom radu akademika Ćemerlića kao političara i naučnika).

Rok za dostavljanje radova je **5. septembar 2025. godine**. Radovi se dostavljaju na email adresu sekretara Organizacijskog odbora, višeg asistenta Haruna Išerića, mr. iur.: h.iseric@pfsa.unsa.ba. Također, nužno je dostaviti u zasebnom dokumentu kratku biografiju (do 500 riječi), koja obavezno sadrži informaciju o datumu rođenja, radnom mjestu, obrazovanju, a iz koje proizilazi da ispunjava uslove učešća u ovom javnom pozivu. Autori su dužni pridržavati se Uputa za autore Godišnjaka Pravnog fakulteta Univerziteta u Sarajevu.

Pravo učešća imaju: (1) zaposlenici/e univerziteta/njihovih organizacionih jedinica u Bosni i Hercegovini u saradničkim zvanjima i zvanju docenta (pod uslovom da je akademski stepen doktora nauka stečen u posljednje tri godine) kao i u ekvivalentnim zvanjima na institutima, (2) studenti/ce doktorskih studija na univerzitetima u Bosni i Hercegovini i oni koji su stekli stepen doktora nauka u posljednje tri godine. Nagrađeni autor/ica će imati priliku rad prezentovati tokom konferencije koja će se održati 9. oktobra 2025. godine, u Rektoratu Univerziteta u Sarajevu. Organizatori će obezbijediti troškove hotelskog smještaja (8.–10. oktobar 2025. godine). **Porodica akademika prof. dr Hamdije Ćemerlića je formirala novčani fond iz kojeg će biti nagrađen najbolji rad. Nagrada će biti dodijeljena tokom spomenute konferencije.**

Prijavljeni/e kandidati i kandidatkinje će o rezultatima selekcije biti obavješteni najkasnije do **25. septembra 2025. godine**.

Izabrani rad će proći proceduru dvostruke recenzije i bit će objavljen u posebnom zborniku radova, u izdanju Univerziteta u Sarajevu – Pravnog fakulteta. U slučaju pitanja i nedoumica, budite slobodni da se obratite sekretaru Organizacijskog odbora, višem asistentu Harunu Išeriću, putem email adrese:

h.iseric@pfsa.unsa.ba

*Predsjednica Organizacijskog odbora
Prof. dr Zinka Grbo, s. r.*